

МАНА БЕЛГ



Черноземельск район

Зургъан сарин эргцд комсомолин 40 джилин өбнд нерәддж Артезиан гидг станцин депод көдлдг комсомольцнр ик шунмгъагъар дөрлдцхәв. Тедн Кизляр-Аәдрхн хойрин хоорнд күнд ачлгъ зөөдг поезд йовулцхана.

Багъчуд дунд КПСС-н членә кандидатд бәәх Александр Ракчеев, комсомольцнр Николай Подворчын, Иван Шевяков, Георгий Дробышев болн нань чигн улс ик гуджрмгәр көдлцхәнә. Поездиг зогслтан угагъар көдлгънд төмр хаалгъин көдлмшт көдлдг Леонид Гаряев, Антонина Санджиева болн залгълдана көдләч Виктор Федоров эдн сәәнәр орлцна.

Целинн район

ВЛКСМ-н 40-ч өбниг уктдж района багъчуд селәд болн поселкс кеерүллгънд шунмгъагъар орлцдж бәәцхәнә. Комсомолец болгън 10-15 мод суулгъх болдж даалгъвр авцхав. «Ленинский» совхозин комсомольск организац кинотеатр тосхв, клуб ясв. Эн совхозд радио болн электрическ герл оруллгъна көдлмш көтрдж йовна.

Хөөчнрин бригадс болгънд комсомольцнрин цуглулсн библиотекс бәәнә.

Приозерн район

Комсомольцнр болн багъчуд комсомолин өбниг күч-көлснә ик диилвртәгъәр тосджана. «Оли әмтнә иньгллгън» гидж нерәдсн парк тәргдәд дуусгдджана. Района центр көк модар кеерүлгдджәнә. Көдлмшәс сул цагт комсомольцнр болн багъчуд хөрн миньгън арслнъ мөнъгнә көдлмш кев. «Сухотинский» совхозин комсомольцнр техник ясджах көдлмштән, горючий болн машин тослдг тос әрвлсндән комсомольск хоршаллгънд 100 миньгън арслнъ орулдж өгв.

Комсомолец Сокиркинә яссн, буудя ачдг машин 32 миньгън арслнъ әрвлх аргъ өгв. Комсомольск хоршалгънд Чналовин нертә болн «Сарпа» совхозмудин багъчуд арвад миньгън арслнъ орулдж өгв. Район цуг бийнъ 200 миньгън арслнъ цуглулв.

Малд хот белдлгънд орлцджах социалистическ дөрлдәнә аш диглгдв, терүнд «Ергенинский» совхозин комсомольск организац сән гидж темдглгдв. Эн совхозин көвүд-күүкд 9.480 тонн өвс хурацхав, 5.120 тонн силос белдв.